



Dyamwamwa Dya Ridô Wa Cikondo

William Marrion Branham

Dyàmwàmwa Dyà Ridô Wa Cikondo

Dinda dyàdyà mvwa mulààdile pa bulààlù bwànyì. Ne mvwa . . .mvwa mulààle tulu, ki mêmè kuloota Joseph ùsaama, ne mvwa mumwambule bwa mêmè kumusambidila. Kadi pângààkatàbulukà, ngàkatàcishiibwa bikole. Mêmè kwamba ne: “Ee, pàmwàpa Joseph neasaame.”

Dya ntangila nunku, kumpala kwànyì, kùvwa kùpita kaamundidimbi kakese, kafiike, kàà diikala ditàmbe kuya ku difiikuluka. Kadi bìvwa bimweke anu bu ne ùvwa mmêmè. Ki mêmè kukàtàngila. Kadi paanyima pààku apu pàvwa pàlwa Muntu kampana mutooke, ne ùvwa n’Yèyè. Mêmè kutuma mèsù kùdi mukàjàànyì, bwa kumona ní ùvwa mutabale, bwa mêmè kumuleeja, bu yèyè ne mushindu wà kumona cikeena-kumona aci. Kadi yèyè ùvwa muye mu tulù.

Mêmè kwamba ne: “Kaa, mfwilèku luse, Mukalenge. Kadi, aci’s ncìvwa nsòmbelu wanyì. Byàkakèngela bwa Wèwè kumpuusa mu byònsò bìndìku mwenze. Dìbà dyònsò divwà cintu kanà cyònsò mwa kwenzeka, mêmè mvwa ndyambidila ne Wèwè nguvwa ucyènza. Kadi ndi mfika ku dyumvwa ne Sataana nguvwa uteeta bwa kundama kule naaci.” Mêmè kwamba ne: “Bu Wèwè anu mwa kundombolaku.” Nunku pàmvwà ntangila apu, mêmè kumona mpala mutàmbe bulenga ùntù ncìyìkù mwanjì kumona muntu nende to. Yèyè ùvwa kumpala kwànyì, mutangile paanyima. KujuulaYe cyanza Cyèndè ne kukwataYe cyànyì mêmè, ne kwasaYe lwendu ùya mu *nunku* ewu. Ki cikeena-kumona aci kunguumukaci. Dyalumingu dyàshààdi edi, mu dinda, mvwa mubiike kumpala kwa dìbà. Aci cìvwa mu diisambombo, cikeena-kumona eci. Mu . . .

Ntu misangu yònsò anu ne meeji àlubakana, ntu misangu yònsò anu ngeela meeji ku difwa. Bwalu, bu múnkaadi ne bidimu makumi ataanu, bìdi ne, matuku àànyì kaàcyèna

kabidi. . .ncìvwa ngeela meeji ne àvwa mapitepite bûngì to. Nénku mvwa ndikonka cîmvwà mwa kwikala mu tèòfànì, mubidi wà mu dyulu awu. “Mbifwànyìnekù kwenza ne mmone balunda bàànyì bàà mushinga mukole abu ne, twàmbè ne, kaadifwima kakese katooke kàpicila pândì apu, ngamba ne: ‘Ki Mwaneetu Neville uyààya wàwa,’ anyì, yèyè kàyìkù mufwànyìne kwamba ne: ‘Wetwawu, Mwaneetu Branham’ anyì? Nénku pààlwà Yesu, díbà adi mèmè mufwànyìne kwikala cyakabidi muntu.” Mvwa ngeela meeji awu misangu yàbûngì.

Mvwa ndoota mwikàle nsanganyibwa mu Wesete. Nénku mvwa ngenda mpicila mu mwaba mukese wùvwà tuumici twa armoises, ne mukàjàànyì ùvwa naanyì, ne tuvwa munkaci mwa kuloba mishipa ya màbundu. Ki mèmè kwimana ne—ne kuunzulula ciibi cya lupangu. Ne maulu àvwa malenga a dikema. Kaàvwa ne mmwenekelu wudiwù nende kuulu kwa cibandabanda eci ewu to. Àvwa a bleu, ne mavuba matooke bikole. Ki mèmè kwambila mukàjàànyì, kwamba ne: “S’bívwa bikèngela bwa twètù kwikalaku mwaba ewu, kwine kwònsò aku’s, munanga wanyì.” Yèyè kwamba ne: “Bwa bânà’s, ki pàvwà pàkèngela bwa twètù kwikala, Billy.” Mèmè kwamba ne: “Aci’s ki. . .” Ki pàànyì ngumba ntabuluka.

Mèmè kudyambidila ne: “Ndi ndoota be! Ndi ndikonka ne mbwà cinyì.” Ki mèmè kupwekesha mèsù, ne yèyè ùvwa mulààle ku luseke lwànyì.

Ki mèmè kjuukila pa musààmù wànyì, mùkaadiku bààbûngì bàà kunùdì nwènù aba bacyènzènze amu, mèmè kuteekela mutu pa dibaya dya—dya kumutu kwa bulààlù adi, nénku mèmè kuteeka byanza paanyima pàànyì. Nénku mvwa mulààdilepù mushindu ewu. Ki mèmè kwamba ne: “Ee, ndi anu ndikonka ne neciikalè cinyì, luseke lukwabo. Nyewu nkààdi ne bidimu makumi ataanu, pàànyì ncyànji kwenzaku cintu nansha cimwe. Bu ne mvwaku mwa kwenza cintu kampana bwa kukwacisha Mukalenge’s, bwalu ndi mumanye ne ncyakwikala wa cifwaka to. Cyabibidi cimwe cya matuku

àànyì cikaadi ciyè, ôwò makese, anyì mapite pa cyabibidi cimwe. Bu mêmè mwa kushààla ne mwoyi too ne ku diikala ne bidimu bûngì bûvwà naabu beena famiye wanyì, kadi nansha nanku cyabibidi cimwe cya matuku àànyì's cikaadi ciyè." Ki mêmè kukenzakana. Nenku mvwa mulààdile mwaba awu, mwikàle ndilongolola bwa kujuuka. Tukààvwa twipacila dîbà mwandamutekete. Mêmè kwamba ne: "Ngeela meeji ne nênye ku ekeleeziya, mu dinda emu. Dîyì dyôdì dimpate, ndi muswe bwa ngaatelejaku Mwaneetu Neville ùyiisha."

Pa nanku mêmè kwamba ne: "Udi mutabale anyì, munanga wanyì?" Kadi yêyè ùvwa muye mu tulù tukole be.

Kadi ncyèna muswe eci cinùpîtè to. Ncinshintulule mêmè. Ncyèna mwa kwikala Mwaneenu Branham umwèumwè wa bwena ùmvwà awu to.

Ki mêmè kutàngila. Ki mêmè kuumvwa Cintu kampanda, citùngùnùke anu ne kwamba ne: "Wêwè's uciði anu ubangilakù. Kolesha diboko mu mvita. Tùngunukà wêwè anu ne kukolesha."

Mêmè kushààla nkùpa mutu ndambu. Mêmè kudyambidila ne: "Ee, pàmwăpa mêmè ngudi anu udyambidila cyôci eci pàànyì cyanàànà." Nudi bamanye's, muntu's ùdi anu mwa kupeta didifwànyikijila kampanda. Ki mêmè kwamba ne: "Pàmwăpa mêmè ngudi anu mudifwànyikijile cyôci aci pàànyì cyanàànà."

Cyôci kwamba ne: "Kolesha diboko mu mvita. Tùngunukà anu ne kuya. Tùngunukà anu ne kuya."

Mêmè kwamba ne: "Pàmwăpa mêmè ngwacyămbì." Ki mêmè kupayika mishiku munkaci mwa mènù, ne kuteeka cyanza ku mishiku.

Ki Cyôci cilwalwà kabidi eci, cyamba ne: "Tùngunukà anu ne kukolesha diboko. Wikala nanshà mumanye ne cidi ku ndekeelu kwa njila ncinyì's we!"

Ki kwenzabi anu bu ne mvwa mwa kuumvwa Graham Snelling, anyì muntu mukwabo kampanda, uvwa wimba musambu awu mushindu ewu (Bàtu bàwimba kaaba aka, Anna Mae ne nwênù bônso aba.):

Ndi ne majiyà a kwetu ne mwoyi wùsaama, ne
ndi njinga kumona Yesu.

Ndi njinga ngùmvwèku ngonga ya myadi
ya yilondangana ya ku cisabu ayi yidila
bituulubituulu.

Ncifwànyìnekù kukenkesha mu kajila kàànyì ne
ncifwànyìne kuumushaku bwôwà bwônso.

Mukalenge, enzaku bwa ntape dîsù dyàmwàmwa
dya rîdô wa cikondo.

Nukàadi bumvwe bàwimba mu ekeleeziya emu.

Ki mêmè kuumvwa Cintu kampanda cyàmba ne: “Udi
muswe kumonaku anu dyàmwàmwa dya rîdô wa cikondo
anyì?”

Mêmè kwamba ne: “Ncifwànyìne kungambulwisha bikole.”

Lenku mêmè kutangila. Anu mu katanci kakese cyanààna,
mêmè. . . mweyelu wùmwèpelè nkààvwa mubwele mu Kaaba
kakese kampanda kàà matelu. Mêmè kutangila paanyima,
kadi ki mêmè wàwa, mulààle pa bulààlù. Ki mêmè kwamba
ne: “Eci’s ncintu cya dikema’s.”

Mpindyewu, ncyêna muswe bwa nwênù kwambulula
cyôci eci to. Eci nkumpala kwa ekeleeziya wanyì mêmè,
anyì mikooko yànyì yîndi ndiisha. Nansha byôbi ne cívwa
ncinyì, ní mvwa mu mubidi ewu anyì pambelu, ní cívwa
nditentemunyiibwa, kacívwa bu mùtù cikeena-kumona cyônso
cínkaadiku mumone eci to. Mvwa mwa kutangila Mwàmwa,
ne mvwa mwa kutangila apa.

Lenku ndi mwenze anu ndyata mu Kaaba kakese aku
anyì, kacya ncitukù mwanjì kumona bantu búngì naka bènda

bàlwa, bèèla mbila mikole ne: “Kaa, mwaneetu wa mushinga mukole!”

Ki mêmè kutangila. Nenku nsongààkàjì, pàmwápa ne bidimu ku mbangilu kwà makumi abidi ne byà mu njila, anyi dikumi ne mwandamukulu too ne ku makumi abidi, biikàle bàngeela maboko kunshingu, bèèla mbila mikole ne: “Mwaneetu wa mushinga mukole!”

Ki nsongààlùmè yilwalwà eyi, mu nsòkà ya busongààlùmè bwàyì. Ne mèsù abo àbàlakana ne mafwanangane ne mitooto mu bufuku bwa mîdimà. Mênù abo matooke zeezeze bu mabwe a busàngà. Nenku bàvwa bèèla mbila mikole, ne bàngeela bitupà, bèèla mbila mikole ne: “Kaa, mwaneetu wa mushinga mukole!”

Ki mêmè kwimana, mêmè kutangila. Nenku mvwa mwànà mutekete. Mêmè kutangila paanyima mubidi wànyì mukulakaji awu mulààle kwàka, ne byanza byànyì bitèèka paanyima pàà mutu. Ki mêmè kwamba ne: “Ebu bwalu ncyèna mbuumvwaku to.”

Nenku nsongààkàjì eyi munkaci mwa kungeelà maboko kunshingu. Mpindyewu, ndi mumanye ne mwaba ewu ngwà bateeleji basambàkàne, kadi ndi ngamba eci ne kalolo ne bupole bwa Nyuma. Bantu balume kabeena mwa kwela bantu bakaji maboko kunshingu kabàyikù bumvwa masansakata a bulume to; kadi aci kacìvwa Mwàmwa to. Kamùvwa nì mmakeelela nì mmààlabà to. Kabàvwa bàcyòka to. Bàvwa . . . Kacyakacya ncìtukù mwanjì kumona bakaji balenga naka to kacya bandela. Bàvwa ne nsuki mibapwekele too ne mu cifuka, jipè mile too ne ku makàsà. Kadi bàvwa anu bànguupukila. Kacìvwa nansha dinguupukila dya bwena dya mwakùnyàànyì wa bakaji wa taawu wa maawu, udi musòmbe pààpa wàwa, mufwànyìne kunguupukila to. Kabàvwa bàntwà mishiku to, ne mêmè ncìvwa mbàtwa mishiku to. Cìvwa ncintu cìndì mêmè—mêmè ewu ncìyikù mupetele mya—myaku to, ncìyikù mupete mya—myaku bwa kucyamba to.

“Bupwàngàne” kî ncifwànyìnekù kukafikapu to. “Cilengèle-
lèngèlèè” kî ncifwànyìnekù nansha kafikapu to, nànsha
kakesè. Cìvwa ncintu cìmvwàku mèmè ewu ncìyikù kacya . .
Bikèngela anu bwa wikalèMu.

Ki mèmè kutangila mu *nunku*, ne mu *naka*. Kadi bàvwa
bàlwa, binunu ne binunu. Ki mèmè kwamba ne: “Ebu bwalu
ncyèna mbuumvwaku to.” Mèmè kwamba ne: “Ee, bàdi . . .”

Kadi ki Hope ulwàlwa ewu. Yèyè nguvwa mukàjàànyì
wa kumpala awu. Kulwaye lubilu, kadi kàyi wàmbakù ne:
“Bayaanyi” to. Yèyè kwamba ne: “Mwaneetu wa musinga
mukole,” nenku pàakanguupukilàye apu, kùvwa muntu
mukaji mukwabo mwimane mwaba awu, ukààvwa
munguupukile pèndè, ki pashiishe Hope kuupukilaye
mwine muntu mukaji awu; kuupukilanganabo ewu ne ewu.
Ki mèmè kudyambidila ne: “Kaa, eci cìdi ne cya kwikala
cintu cishìilàngàne. Kacyena mwa kwikala . . . Kùdi cintu
kampanda . . .” Mèmè kudyambidila ne: “Kaa, ndiku
mufwànyìne kuswa bwa kwalukila cyakabidi ku cibidibidi cya
kale cyàcya anyì?”

Mèmè kukenzakana dîbà adi. Mèmè kudyambidila ne:
“Ncinyì eci?” Ki mèmè kutangila, kutangila bîmpè menemene.
Ki mèmè—mèmè ne: “Ebu bwalu ncyèna—ncyèna mwa
kubuumvwaku to.” Kadi Hope ùvwa ùmwèka yèyè anu bu udi,
kaa, bu mwenyi wa cisakà’s. Kàvwa mushìilàngàne to, kadi
anu bu mwenyi wa cisakà.

Ki dîbà adi mèmè kuumvwa Dîyì dîvwà dyakùle naanyì,
dîvwà mu cibambalu amu adi, dyàmbe ne: “Cyùvwà muyiishe
ne n’Nyuma Mwîmpè aci kadi ki cyòcì eci. Ki Dinanga
dipwàngàne ndyòdì edi. Ne cintu nansha cimwe kacyenaku
mwa kubwela Muneemu emu kacìyi naaDi to.”

Mèmè ndi mupangadike, bitàmbe ne kwònsò eku mu
nsòmbelu wanyì, bwa ne bìdi bikèngela Dinanga dipwàngàne,
bwa kubwela Mwômò amu. Kamùvwakù mukawu to.
Kamùvwa dicyoka to. Kamùvwa lufu to. Bubeedi kabùvwakù

bufwànyine kudyataMu to. Cifwaka kacìvwakù—kacìvwakù cifwànyine kukuvwija mukulakaji to. Nenku. . .Kabàvwakù bafwànyine kudila myadi to. Cìvwa anu disanka pa dyôdì.

“Kaa, mwaneetu wa mushinga mukole!” Ki kuyabo naanyi kuulu, ne kunsòmbeshabò pa mwaba mutumbuke munene menemene.

Mêmè kudyambidila ne: “Ncyêna munkaci mwa kuloota to. Ndi munkaci mwa kutangila paanyima mubidi wànyì—wànyì mulààle pa bulààlù apa.”

Ki kunsòmbeshabò kuulu aku. Ki mêmè kwamba ne: “Kaa, kabivwa bikèngela bwa mêmè kwikala musòmbè kuulu eku to.”

Kadi ki bakaji ne balume bàlwalwà aba, bàfùmina ku nseke yònsò yibidi, anu mu nsòkà yàbò ya bunsongà menemene, bèèla mbila mikole. Nenku muntu mukaji kampanda ùvwa mwimane mwaba awu, ki kwelaye lubila lukole ne: “Kaa, mwaneetu wa mushinga mukole! Kaa, tudi ne disanka dîngì be dyà kukumona Mwab’ewu.”

Mêmè kwamba ne: “Ebu bwalu ncyêna mbuumvwaku to.”

Ki dîbà adi Dîyì dya bwena dîvwà dyàkulà adi, dyàkwila kumutu kwànyì aku, kwambaDì ne: “Udi mumanye’s, mbafunde mu Bible ne baprofeta baakasangishiibwa pamwe ne bàà kwabo.”

Ki mêmè ne: “Eyowa. Ndi mvuluka aci mu Mifundu.”

Dyôdì ne: “Ee, apa mpawàsangishiibwà pamwe ne bàà kwenu.”

Mêmè ne: “Dîbà adi nebìikalè bàà cya bushuwa, ne mêmè ndi mwa kubalenga’s.”

“Kaa, eyowa’s.”

Mêmè ne: “Kadi, s’nyawu bàdì mìllyô. Ba-Branhams kabàtu bûngì nanku to.”

Ki Dîyì adi kwambaDì ne: “Abu kî mba-Branhams to. Abu mbawàkakùdimwishà wêwè mucima. Abu mbawàkalombolà

kùdi Mukalenge.” Ki kwambaDi ne: “Bamwe bàà ku bakaji bàdi mwab’awu abu, baùdi udyambidila ne mbalenga kwîsù abu, bàvwa ne bidimu bipite pa makumi citeema pawàkabàlombolà kùdi Mukalenge. Kabyena bikemesha to pàdìbo bèèla mbila mikole ne: ‘Mwaneetu wa mushinga mukole!’ apu.”

Ki kwelabo lubila lukole, bônso cyapamwe, bàmba ne: “Bu ne kùvwa muye to, nunku twètù aba katùvwa mwa kwikala Mwab’ewu to.”

Mêmè kukenzakana. Mêmè kudyambidila ne: “Ee, ncyèna anu mbyumvwa to.”

Mêmè kwamba ne: “Kaa, Yesu ùdi penyì? Ndi musweku kuMumona, bibi be.”

Kwambabo ne: “Bwa mpindyewu, Yèyè ùdi anu kuulu ndambu, anu lwà kuulu bu uyààya *kwàka*.” Bôbò ne: “Dìngà dituku Yèyè nealwe kùdi.” Nwamonu anyì? Bôbò ne: “Wèwè ùvwa mutumiibwe, bu mulombodi. Nenku Nzambi nealwe. Ne pààlwàYe, neAkulumbulwishe bilondèshile biwàkabàlongeshà, dyambedi, ní bàbwela anyì ní kabàkubwela. Twètù netubwele bilondèshile dilongesha dyebe wèwè.”

Mêmè kwamba ne: “Kaa, ndi ne disanka dyàbùngì be. Pòlò ùvwa, bìdi bikèngela bwa kwimanaye mushindu ewu anyì? Bìdi bikèngela bwa Peetèlò kwimanaye mushindu ewu anyì?”

“Eyowa.”

Mêmè kwamba ne: “Dìbà adi mêmè’s ndi muyiishe Dìyi dyònsò didìbo bôbò bayiishè. Kacya ncitukù museesùkeKù to, ní nku elu luseke ní nku lukwabo. Mwaba wùvwàbo bôbò babàtìize mu Dìna dya Yesu Kilisto, mmùndì mêmè pàànyì mubatiize. Mwaba wùvwàbo bôbò balongèshe dibatiiza dya Nyuma Mwîmpè awu, ncìndì mêmè pàànyì mulongèshe. Cyònsò cyàkalongeshàbo bôbò aci, ncìndì pàànyì mulongèshe.”

Ki bantu abu kwelabo lubila lukole, kwambabo ne: “Tudi bamanye aci. Ne tudi bamanye ne netwalukile pamwe neebe, dîngà dituku, pa buloba.” Kwambabo ne: “Yesu nealwe, ne wêwè neulumbulwishiibwe bilondèshile Dîyî diwàkatùyiishà. Ne pashiishe wêwè mwitabiibwe dîbà adi, bwalu wêwè newitabiibwe,” ki bôbò ne, “dîbà adi neutuleeje kùdîYe, bu bivulukilu byèbè bya mudimu wèbè wà bwambi.” Bôbò ne: “Wêwè neutulombole kùdîYe, nenku, bônso pamwe, netwalukile pa buloba, bwa kusòmbelapù kashidi.”

Mêmè kwamba ne: “Bikèngela ngaalukile mpindyewu anyi?”

“Eyowa. Kadi tungunuka ne kukolesha.”

Mêmè kutangila. Ne mvwa mwa kumona bantu, anu kacya bangatangana too ne kùvwa mèsù àshiikila aku, biikàle anu bènda bàlwa, bàswa bwa kunguupukila, bèèla lubila ne: “Mwaneetu wa mushinga mukole!”

Anu dîbà adi ki Dîyî kampanda kwambaDi ne: “Cyònsò cyûkaadiku munange, ne cyònsò cikaadiku cikunangè, Nzambi wakupeeshibi Mwaba ewu.” Ki mêmè kutangila. Ki mbwa wanyî wa kale ulwàlwa ewu, wènda ùlwa kùndi. Ki kabalù kàànyî kàlwalwà aka, ne kunteekaku mutu pa dikaaya, ne kupumaku. KwambaDi ne: “Cyònsò cyûkaadiku munange, ne cyònsò cikaadiku cikunangè, Nzambi wakupeeshibi mu cyanza, ku mudimu webe wà bwambi.”

Ki mêmè kudyumvwa ngenda nguumuka mu Mwaba mulenga awu.

Ki mêmè kukenzakana. Mêmè kwamba ne: “Udi mutabale anyi, munanga wanyî?” Yèyè ùcivwa kacya anu wàya mu tulu.

Ki mêmè kudyambidila ne: “Éyî Nzambi! Kaa, nkwàcìshèku, Éyî Nzambi. Kundekediku ndya cibanga pa bidì bitàngila Dîyî nansha dimwe to. Nshaale anu mululame pa Dîyî adi, ne nDiyiishè. Bibandè anyi bipwekè, cìdì ní nganyî ní nganyî wènza; nansha kujuukè ba-Shawùlà búngì

munyi...bâna bàà Kishà, nansha *bikampanda*, *bikasanga*, anyi *bikankenga* bijuukè bûngi munyi. Anyishàku, Mukalenge, nkoleshè nye too ne ku Mwaba wàwa.” Bwôwà bwônsò bwa lufu...

Ndi ngamba nanku, mwikàle ne Bible wanyì kumpala kwànyì, mu dinda emu. Ndi ne mwânà mutekete wa balume mwaba wàwa, wa bidimu binaayi, wa dikolesha. Ndi ne mwânà wa bakaji wa bidimu citeema; ne nsongà, ûndì ne kusakidila bwa bwalu bwèndè, udi mukudimukile mu njila wa Mukalenge. Nzambi, enzaku bwa ngiikalè ne mwoyi, bwa ngaabàkoleshilaku mu mibelu ya Nzambi.

Ne pa kuumusha cyôci aci, buloba bujimà mbyenze anu bu ne bàdi bèèla lubila lukole kûndi, bakaji ne balume bàà bidimu makumi citeema, ne bàà mishindu yônsò ne: “Bu ne kùvwa muye to, twêtu aba katùvwakù mwa kwikala Mwab’ewu to.”

Nenku Nzambi, anyishàku nkoleshè diboko mu mvita. Kadi pàkaadibi ne ki lufu ndwôlò elu, mémè ncyênàku nshààla kabungàme to. Ncifwànyine kwikala disanka, ncifwànyine kwikala cya cyènza mulòwù, bwa kubwela, kuumuka mu dibola edi ne bundu ebu.

Bu ne mvwaku mwa kwenza, muulu mwàmwa, kilòmèètà mìlìyò binunu lukama ne makumi ataanu, cipaapu cya nseke yinaayi, nenku ki Dinanga dipwàngàne ndyôdi dyàdya, cidya cyônsò mu nunku ewu, bìdi bibùmbakana, too ne mutùdì tupweka mu mwaba wutùdì tusanginyiibwa mpindyewu ewu. Ncifwànyine kwikala anu mundidimbi naka wà dibola, kaacintu kakese katùdì mwa kuumvwa mu meeji aku ne kuumvwa ku dilenga ne kùdi cintu kampanda mu mwaba kampanda. Katwena tumanya ne Cìdi ncinyi to.

Kaa, nwênù balunda bàànyì bàà mushinga mukole, bananga bàànyì, bananga bàànyì mu Evanjeeliyo, bàna bàànyì bàndì mulelele Nzambi, ntèèlejaayi, mémè mpaasata wenu. Nwênù, mvwa mwa kujinga ne kwikalakù mushindu

kampana wà kunuumvwijaci. Kakwena myaku miine to; ncyèna mufwànyine kuyipeta to; kayeena yìsanganyiibwa mwaba nansha wumwe to. Kadi anu dyàmwàmwa dya mweyelu wà ndekeelu ewu, ki kùdì cintu cya citàmbe kwikala cya butumbi cinùdi kacya kanùyikù...Kakwena mushindu wà kucyumvwija to. Kakwena mushindu to. Ncyèna anu mwa kucyumvwijaku to. Kadi cyònsò cyùdì wenza, wèwè mulunda wanyì, teeka ku luseke bikwabo byònsò too ne paùdi upeta Dinanga dipwàngàne. Fikà kaaba kàà ne udi mwa kunanga bantu bònsò, mwena lukuna yònsò, bikwabo byònsò.

DikamwènekelanganaMù dimwepele adi, bwànyì mèmè, ndimvwije muntu mushiilàngàne. Ncyènakù nansha kakese, nansha kakese, nansha kakese mwa kwikala Mwaneenu Branham wa mwomumwe wa bwena úmvwà awu to. Nansha bu ndèkè mwa kutenkakana, nansha bu mikenyi mwa kwela, nansha bu mutentekedi mwa kunteekela cingoma bwa kungaasa, nansha ciikàle cinyì, kacyna cyènza bwalu to. Mèmè nènkoleshè anu diboko mu mvita, ku ngàsà wa Nzambi. Bwalu, ndi muyiishe Evanjeeliyo kùdì cifukiibwa cyònsò ne kùdì muntu yònsò úndiku pàànyì mwa kuyiisha awu, mwikàle mbaswisha bwa kuya ku Buloba bulenga bwa dyàmwàmwa abu.

Bìdi mwa kumweka bikole. Bìdi mwa kulomba dikanda dyàbúngì. Ncyèna mumanye ne nntanta bule kaayi to. Katwena bamanye to, bwa mudibi ewu. Ku...Ku diteeta dyànyì dya dituku adi adi, yèyè úvwa mwambe ne: “Wèwè ucidi ne bidimu makumi abidi ne bitaanu bya mwoyi wà usumakaja mènù, mwímpè. Wèwè udi mukolakane.” Aci ncinkwacisheku. Kadi, kaa, kacivwa aci to. Kì ng’aci to. Ncintu kampana munda *emu*. Bìdi bìkèngela bwa dibola edi divwalè dibènga-kubola. Cya cifwaka eci bìkèngela cìvwalè dibènga-kufwa.

Bànà bàà Kishà bàdi mwa kjuuka. Ndi...Bintu bìmpè byònsò bìdìbo bènza abi, ncyèna ne bwalu bubì

bûndiku mwa kubyamba to, dipèèshà dya bapele bintu ne dipeeshangana dya kàà pa luse. Kadi vùlukàayi, mona's, Samwèlè wàkambila Shawùlà ne: "Wêwè newâmbè pèèbè ciprofeta." Ne bààbûngì bàà ku bantu abu mbayiishi banene, bàà bukole, biikàle mwa kuyiisha Dîyì bu bàrkanjèlò. Kadi nansha nanku kacìvwa anu diswa dya Nzambi to. Bìvwa bìkèngela bwa Nzambi kwikalalaYe wabò mfumu. Wêwè mwaneetu wa balume, wêwè mwaneetu wa bakaji, lekela Nyuma Mwîmpè akulombole.

Twînyikààyaaku mitu yetu bwa katanci kakese cyanààna.

Ndi ne majiyà makole a kwetu ne mwoyi
wùsaama . . . ne ndi njinga kumona Yesu,

Ndi njinga ngûmvwèku ngonga ya myadi
ya yìlondangana ya ku cisabu ayi yìdila
bituulubituulu;

Ncifwànyìnekù kukenkesha mu kajila kàànyì ne
ncifwànyìne kuumushaku bwôwà bwônso;

Mukalenge, enzaku bwa tutape dîsù
dyàmwàmwa dya rîdô wa cikondo.

Mukalenge, enzaku bwa ntape dîsù dyàmwàmwa
dya rîdô wa tunyinganyinga ne bwôwà,

Enzaku bwa mmone ditunga dîdì dibàlakanà ne
nsèsà ya dîbà adi;

Ncifwànyìnekù kukankamika diitabuuja ne
ncifwànyìne kuumusha bwôwà bwônso;

Mukalenge, enzaku bwa bàtapè dîsù
dyàmwàmwa dya rîdô wa cikondo.

Ndi mutwishiibwe, Mukalenge, bu ne ekeleeziya mukese ewu, mu dinda emu, ùvwakù anu mwa kutapa dîsù dyàmwàmwa dya rîdô: kakùyìkù tunyinganyinga munkaci mwàbò to, katùvwakù tufwànyìne kwikalaku to; bubeedi nansha bumwe; kakùyìkù cîngà cintu to anu bupwàngàne. Ne cìdì anu mweyelu wùmwèpelè cyanààna pankaci pàà mwab'ewu ne Mwômo amu, pàà bukulukaji ne bunsongà,

pàà cikondo ne Cyendèlèlè, pàà dyelakana dya mààlabà ne tunyinyanya twa makeelela, too ne ku cikondo cya mpindyewu cya Cyendèlèlè mu bupwàngàne.

Ndi ndomba, Nzambi, bwa Wèwè kubeneshaku muntu yònsò mwab'ewu, pìikalàku mwab'ewu, Mukalenge, bàdi kabàyi baKumanye mu mushindu awu wà Dinanga. Ne mu bulelela, Taatù, cintu nansha cimwe kî ncifwànyìnekù kubwela mu Mwaba wa cijila awu kaciyi ne Dinanga dya mushindu awu to, Dilediibwa dya cyakabidi, kwikala mulediibwe cyakabidi. Nyuma Mwîmpè, Nzambi, ùdi Dinanga, ne twètù tudi bamanye ne aci ncilelela. Nansha twètù tutentemuna mikuna ku diitabuuja dyetu, pìikalàbi ne tukàadi benze bintu binène, nansha nanku, kakùyi Cyòci aci to, katwenaku bafwànyìne kubànda cibàndilu cinène aci mwàmwa to. Kadi ne Cyòci aci, neCitutuntumune kumutu kwa maalù àdi àtàcisha a pa buloba aa. Ndi ndomba, Taatù, bwa Wèwè kubeneshaku bantu bàdi kaaba aka aba.

Nenku swaku, bwa ne, muntu yònsò wanteeleji, mu dinda emu, ngamba Bulelela ebu awu, bwa Wèwè kwikala ntemu wanyì, Mukalenge, bu Samwèlè wa kale awu ne: “Kacya nkààdikù mubàmbile cintu kampanda mu Dìna Dyebe civwà kaciyi cilelela anyì?” Bòbò ki banzuji. Nenku ndi mbambila mpindyewu, Mukalenge, bwa ne Wèwè udi muye naanyì ku Buloba abu. Ne Wèwè udi mumanye ne ncilelela.

Nenku mpindyewu, Taatù, kwòkò kwikàle bamwe bàdi kabàyi baKumanye to, swaku bwa edi diikalè dîbà dyàmbàbo ne: “Mukalenge, teekaku munda mwànyì diswa dîdì ne cya kwikala diswa Dyèbè Wèwè.” Enzaku nanku, Taatù.

Nenku mpindyewu, nwènù, ne mitu yenu miinyika, swayi nwèlèku byanza byenu muulu, nwamba ne: “Nsambidilèku, Mwaneetu Branham, diswa dya Nzambi munda mwànyì.”

Mpindyewu wèwè paùdi mwaba mene wùdì awu apu, anu bituulubituulu menemene, bwa cinyì kùyikù wambila Taatù ne: “Nzambi, munda mwa mwoyi wànyì leelu ewu,

ndi ndekela maalu ônsò a pa buloba. Ndi ndekela byônsò, bwa kuKunanga ne kuKukwacila mudimu, matuku àànyì ônsò a mwoyi. Nenku, kubangila ku dituku edi, kubangila apa, nênkulondè, mu Mufundu wônsò wà Bible Webè”? Pawikalà kùyi mubatiijiibwe mu dibatiiza dya bwena Kilisto: “Nêmbatiijiibwè, Mukalenge.”

“Pângìikalà ncìyi mwanji kupeta Nyuma Mwîmpè to. . .” Neumanye pawikalà muMupetè. NeÀkupèèshè—NeÀkupèèshè ditwishiiibwa ne Dinanga didi dikukèngela. Kaa, wèwè udi mufwànyine kwikala mwenze bishiilàngàne, mupete masaluka, bu mùdi mufwànyine kwikala mwele mbila anyi mwakule mu myakulu, cidi anu cimpè. Kadi Dinanga dya Nzambi adi dyôdi kadìyimù to, ungiitabuujè mpindyewu, amba ne: “Mukalenge, teekaku munda mwa mwoyi wànyì, ne munda mwa musuuka wànyì, dikumbaja dya kiipacila kàà Nyuma Webè, bwa mèmè kunanga, ne kutwa mushinga, ne kwikala ne Dinanga dya Nzambi adi munda mwa mwoyi wànyì, leelu ewu, didi difwànyine kuya naanyì ku Buloba abu pìikalà mweyelu wànyì wà ndekeelu mwa kungumuka,” patùdi tusambila apa. Sambila, wèwè mwine, mpindyewu. Mu wèbè mushindu wà sungasunga, sambila, lomba Nzambi bwa akwenzele cyôci aci.

Ndi mununange. Ndi mununange. Nwênu balume bàà mya ku mitu bàdi basòmbe apa aba, bàkaadi benzenze mudimu mukole ne badiishèdiishe bânà bakese abu! Nwênù baamaamù bakulakaji, bakwate ne bya luse bàkaadi bakùpùlèkùpùle binsonji kwisù kwàbò abu! Itàbàku nkushindikile eci, wèwè mwaneetu wa bakaji munanga, kabyena mushindu awu to dyàmwàmwa dya mweyelu mukwabo wàwa. Ndi mèmè ngiitabuujà kakùyi mpatà to ne Cidi mu cibambalu emu. Cidi anu mmu cipaapu citùdi basòmbèle. Eci cidi anu ndibola ditùdi basombèlemù mpindyewu.

“Kadi swilakù munda mwànyì, Mukalenge, diswa Dyèbè dya kwikala nanku.” Sambila, patùdi tusambila cyapamwe apa.

Ne kaneemu kònsò, Mukalenge, biimànyìne pa cishimikidi cya Dìyi Dyèbè ne cya Nyuma Mwímpè Webè, tudi ne disanka be dya kumanya ne Dilediibwa dyetu didi difumina penyì. Tudi ne disanka dya mutùdi “balediibwe kakùyì ku diswa dya muntu, anyì ku diswa dya musunya, kadi ku diswa dya Nzambi.”

Nenku tudi tulomba, leelu ewu, Taatù, bwa ne aba bàdi munkaci mwa kulomba mpindyewu ngàsà udi ufwà luse aba, Nyuma Webè ènzèku mudimu awu, Mukalenge. Kakwenaku mushindu wà mèmè kucyenza to; mèmè ndi anu muntu wetù ewu, mukwabo mwànà wa Kishà. Kadi tudi Neebe Wèwè dijinga, Nyuma Mwímpè.

Nzambi, anyishàku ngìikalè bu Samwèlè, udi wamba Bulelela bwa Dìyi. Ne Wèwè udi muDìshìndikèshìndike, bwa too ne leelu, ne ndi ngiitabuujà ne Wèwè neutungunuke, bwa pàncidì mushààle ne lulamatu Kùdi apa.

Swaku bwa bôbò bônsò mpindyewu bàpetè Mwoyi wà Cyendèlèlèlè, Taatù. Swaku bwa dituku edi kadibàbàfukukù to. Pa dībà dyalwabo kushiyangana ne buloba ebu, swaku bwa cyôci eci, cìndì mfuma ku dibambila eci, cìkangukè cìlwe cintu cilelela. Ne patùdi basòmbe kaaba aka apa, bàà cifwaka, leelu ewu, biikàle tutangila pa dībà dyetu dya ku diboko apa, tutùma meeji ku didya dyetu dya mundaamuunya, ku mudimu wà màalabà, ku diditacisha ne midimu mikole ya panwapa ne, kabyakwikalaku dībà adi nansha. Byònsò abi nebijimine. Kakwakwikalaku diditacisha to, kadi anu disanka dya Cyendèlèlèlè kacya dyàngatangana. Bàpèèshèku Mwoyi wà mushindu awu, Taatù, muntu ne muntu. Ne swaku . . .

Ndi nKulomba nunku, Taatù, bwa ne muntu yònsò udi kaaba aka mu dinda emu, udi munteeleje ndonda cikeena-kumona eci, swaku bwa ngaatwilangana ne yònsò wa kùdìbo luseke lukwabo lwàlwa; nansha mùdìku mwa kwikala bantu balume mwab'ewu bàdi bafwànyìne kubenga kutwa ku cyànyì, ne bantu bakaji kabidi. Kadi, Taatù, kùlekedikù aci

citùcyàmakana mu njila to. Swaku bwa twatwilanganaMu naabo, ne bwa kunyeemabo pààbò lubilu, ne bwa twêtù kuupukilangana muntu ne mukwèndè, twela lubila lukole ne: “Mwaneetu wa mushinga mukole.” Anyishàku bwa biikalè mwakaleejibwabi Mwàmwa amu, Mukalenge, bwa bônso, bônso bândi munange, ne bônso bàdi bannange abu. Ndi ndomba bwa biikalakù mushindu awu, Mukalenge. Ne mèmè ndi mubanange bônso. Anyishàku bwa bààmwènèka, Taatù. Ndi mbapeesha Mwoyi wà Cyendèlèlèlè mpindyewu. Swaku bwa bôbò bènzè wàbò mudimu, bwa kuWitaba. Bwalu ndi ndomba nunku mu Dînà dya Yesu. Amen.

Tudiku anu ne tusunsa tukese cyanààna, bwa kusambidila babeedi. Ndi mmona ne tudi ne mwànà wa bakaji mutekete, udi usaama mwab’ewu, ne inābànza kampana mu nkwasu.

Mpindyewu, kùdì bânà beetu bàà balume, bânà beetu bàà bakaji bàà mushinga mukole, bu nwènù mwa kuswa kanungumvuku bibi to. Ncyèna—ncyèna mumanye ne civwà cyenzèke ncinganyì to. Ncyèna mumanye ne civwà cyenzèke ncinganyì to. Kadi, Nzambi, pângààfwà, anyishàku bwa ngààlukilè Mwômò amu. Anyishàku anu bwa nye mu Mwaba awu, mwômò amu mmùndi muswe kwikala, mwônso mùvwàku amu. Mèmè ncyèna nteeta bwa kwikala Pòlò wàkangaciibwa muulu mu mau lu miisàtù awu to. Kí ng’aci cìndì ngamba to. Ndi ngiitabuuja ne Yèyè ùvwa ùteeta anu bwa kunkoleshaku ku mwoyi, ùteeta bwa kumpeesha kaacintu kakese kampana bwa kunsaka bwa ntungunuke, mu mudimu wànyì wà bwambi mupyamupya wùdì wùlwa kumpala eku awu.

(Katùpà kàà ku Mfùmù Mubèngìibwe, diyiisha dyà 15.05.1960)

CILUBA

©2024 VGR, ALL RIGHTS RESERVED

VOICE OF GOD RECORDINGS
P.O. Box 950, Jeffersonville, Indiana 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilsto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwîlà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyî wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org